

Ic Colyn van Baersdorp make cond, ende kenlic allen den genen, die sesen brief sullen sien, of hoeren lesen, dat ic verkost hebbe Heren Boudyn van Baersdorp, Ridder, minen neve, derdalfhondert gemeten ambochts, liggende in der porchien van Baersdorp, ende in Symontskercke, ambocht, ende ambochts vervolch, ende al dat ic [hebbe] ende mi toebehoert, liggende in desen voirsz. ambochte, ende alle die hofsteden, die mi toebehoeren, ende voert al, dat ic hebben an die mole in Baersdorp.

Ende dit voirsz. ambacht mit sinen toebehoeren gelove ic over te ghevene voir minen lieven Heere van Holland tuschen dit, ende Bamisse naestcomende ten sinen scoensten. Ende wairt dat sake, dat ict niet en dade, soe bid ic minen lieven genadigen [Heere] van Hollant, dat hy 't Heeren Boudyn van Baersdorp, Ridder, minen neve, over ghyften wil, gelikerwys of icker selve teechwoirdich waere.

Ende coirt soe verlidic mi Colyn van Baersdorp den eersten penninc, ende den lesten voir desen voirsz. ambochte, molen, ende hofstede vol, ende al betailt, ende seelde hem dair of quyt nu, ende ewelic. Ende omdat dit wair is, soe hebbe ic Colyn van Baersdorp voirsz. desen brief besegelt mid minen zegele.

Ende om die meerre zekerheit wille, soe hebbe ic gebede, ende bidde Manne ons liefs Heren van Holland, Heeren Jan van Schengen, Ridder, minen neve, ende Jan, Willems zoen, ende Clais, Willems zoen, dat zy desen brieve mit mi, ende over mi besegellen willen. Ende om beden willen Colyns van Baersdorp voirsz. so hebben wy desen brieven besegelt mit onsen segele, anno XIIIIC. ende negen dagen, des Dynxdages na onser Vrouwen dach nativitatis.

Willem, enz. doen cond allen luden, dat wy geconfirmeert, ende verleent hebben, confirmeren, ende verlenen mit desen brieve onsen geminden Heren Boudyn van Baersdorp, Ridder, alsulke coip, als hu tgeghens Colyn van Baersdorp, sinen Oem, gecost heeft, dats te wete dordalfhondert gemete ambochts, ambochtsgevolch, luttel min, ofte meer, mid molen, mid hofsteden, gelegen in den prochien van Baersdorp, ende Symontskerck, ende mit anders allen sinen toebehoeren gelikerwys, ende in alre manyeren, alst Colyn voirnoemt aldair te hebben, ende van ons te houden plach, dende die brieve, dair onse tgegenwoirden brieve doirgesteken syn, in houden, ende begrypen. Ende hier voir hebben wy ontsaen by handen ons getruwen Trezoiers Foykyn, Heere tot Waelwyc, diere ons goede bewisinge of doen sal, dordalfhondert Wilhelms guldene, ende bekennen ons dair of wel voldaan den lesten penninc mitten eersten. In oirconde enz. Gegeven tot Rotterdam upten XIXsten dach in Septembri, anno XIIIIC ende negen